



12. Korrika. Euskararen tokia globalizazioan

Korrikaren 12. edizioa 2001eko martxoaren 29an hasi zen Gasteizen, eta, 2.150 km egin ostean, apirilaren 8an bukatu zen Baionan, *“Mundu bat euskarara bildu”* lelopean. Gasteizko lehendabiziko kilometroan, Carmona bermeotarrak eraman zuen lekukoa, artean Alaves Futbol Taldeko kapitain gisa. Omendua, aldiz, Bertsozaleen Elkartearen izena zen, eta nor egokiagorik lekuko barruko mezua sortzeko, Andoni Egaña baino?; musika-arloan, berriz, Fermin Muguruzak *“Big Beñat”* kanta ezaguna konposatu zuen.

Globalizazioaren milurtekoaren hasieran geunden. Garai hartan jakin genuen XXI. mendean zehar munduko hizkuntzen % 90 inguru desagertu egingo zirela; hortaz, zer gertatuko zitzaion euskarari? Darwinek esan zuen bezala: *“egokitu ala hil”*; eta, zalantzarik gabe, euskarak orduan ere bazuen zer esan eta zer eman. Edizio horretako leloak, *“Mundu bat euskarara bildu”*, kezka horri egiten dio erreferentzia.

Lehen esan bezala, omendua Bertsozaleen Elkartearen izatea erabaki zuen AEK-k, elkarteak inork baino hobeto jakin zuelako tradizioa eta modernitatea euskal komunitatean uztartzen. Fermin Muguruzak ere usadioak eta gaurkotasuna lotu nahi izan zituen, eta *“Big Beñat”* kantaren bideoklipetan ideia horri buruzko hainbat erreferentzia egin zituen, kritika moduan.

Bitxikeria moduan, esango dugu ukaezina dela *“Big Beñat”* ezagunenetakoa eta maitatuenetakoa dela Korrika abesti guztien artean, baina jakin al duzue Fermin Muguruzak beste bi abesti ere konposatu dizkiela KORRIKARI eta AEKRI? Horietakoa bat, gerora, 21. Korrikarako sorturiko *“Klika”* abestia izan zen (lasai: hori aurrerago kontatuko dizuet); bestea, aldiz, 1988. urtean, Kortatu taldearekin ari zela *“AEK-ko beteranoak”* izan zen. Azken kanta horren letrak jolas egiten du euskal esaera zaharrekin (antza, Irungo AEKn ikasten ari zenean, orduko irakasleak atsoitz asko erakutsi zizkion Fermini); bestalde, aipagarria da abesti horretan jadanik nabaritzen dela Negu Gorriak aurrerantzean izango zuen estiloa.

Azken aldian, *“Covid-19”* hitza gehiegi ibili dugu ahoan; 2001ean, ostera, *“behi eroen gaitza”* izan zen *“moda”*ko esapidea. Gaixotasun horren erruz, nahiko komeria izan zituen AEK-k Hegoaldean; izan ere, apirilaren 1ean, Korrika ordurako hasia zela, Iparraldeko egunkari batean honako albiste hau argitaratu zen: *“Gaitza ez zabaltzeko, Frantziako Gobernuak mugak itxiko ditu”*. Horren aurrean, Hego Euskal Herriko antolatzaileen artean kezka zabaldu zen: zer pasatuko ote zitzaion Korrikari? Zorionez, amaieran dena txantxa bat besterik ez zen izan: kontua da Iparraldekoek apirilaren 1ean ospatzen dutela Inuzente Eguna, eta tokiko egunkari horri brometan ibiltzea ote zitzaion. (eta, orain... argi ibili egunkarietakoek ez ote duten txantxa bera egingo Covid-19arekin...).

Hurrengo edizioan, Nafarroako Gobernuak, azkeneko unean, Korrikari debekatu egin zion Iruñean sartzea. Bai, badakit zer ari zireten pentsatzen: beste inozentada bat zela gobernuaren aldetik; bada, agian bai, baina gertaera benetakoa izan zen. Istorio horren inguruan xehetasun gehiagorik jakin nahi baduzue, ez galdu hurrengo atala. Bitartean, beti bezala, txintxoak izan. Agur, eta ondo izan!